

Lelaki dikhuatiri lemas ketika memancing di Lanchang

- Oleh HARIS FADILAH AHMAD
- 18 Januari 2023, 10:55 am



LOKASI seorang pemancing berusia 23 tahun dikhuatiri lemas berdekatan Jambatan Mempatih, Lanchang di Temerloh, Pahang. - IHSAN JBPM PAHANG

TEMERLOH: Selepas kejadian lemas remaja berusia 19 tahun di Sungai Pahang berdekatan Kampung Batu Bor, Bera empat hari lalu, kini seorang lagi lelaki dikhuatiri ditimpa nasib sama ketika memancing di Jambatan Mempatih, Lanchang di sini.

Mangsa, Muhammad Ikhran, 23, dilaporkan memancing bersama rakannya sebelum terjatuh dari tebing pada pukul 9.57 malam tadi.

Penolong Pengarah (Operasi) Jabatan Bomba dan Penyelamat Malaysia (JBPM) Pahang, Ismail Abdul Ghani berkata, pihaknya menerima maklumat daripada polis pada pukul 10.56 malam tentang kejadian ini.

“Seramai lapan orang pegawai serta anggota dari Balai Bomba dan Penyelamat (BBP) Mentakab bergegas ke tempat kejadian dengan menaiki dua jentera.

“Maklumat awal saksi memberitahu terdengar jeritan meminta tolong daripada mangsa,” katanya dalam kenyataan di sini hari ini.

Menurut Ismail, pasukan bomba kemudiannya bertindak memulakan operasi mencari dan menyelamatkan (SAR) di sekitar tempat kejadian sebelum ditangguhkan pagi ini.

Jelasnya, Pasukan Penyelamat Di Air (PPDA) Bukit Angin sudah dimaklumkan bagi membantu operasi bermula pukul 8 pagi ini dan sehingga kini mangsa masih belum ditemukan. – UTUSAN